



‘NA BOTTA ‘NTA LA NOTTI
di *Vincenzo Vitale*
Castellammare del Golfo (TP)

‘Na botta ‘nta la notti
‘n menzu la cunfusioni
di lu ventu,
la trama forti
di l’acqua,
li lamenti longhi
di l’armali,
a cùrmu di la timpesta.
‘Na botta ‘nta la notti,
sula, pisanti,
comu un trarimentu.
Cu’ durmìa
satàu ‘nta lu lettu,
cu’ era svigghiu
lu sangu ci agghiacciàu.
Curpiù ancora
la manu di Cainu
e fici un fossu
dintru ‘dda famigghia.



QUANNU FU ASTUTATU
di Giuseppe Furco
Castellammare del Golfo (TP)

Oh suli, chi stai fermu mentri bruci,
lu to caluri è tutta na furnaci,
riscardi la terra e pi tia produci
e ognunu cerca dunnì megghiu piaci.
‘Nta sta vita amara chiù chi duci
quannu t’affacci tu, regna la paci,
anticu di millenni ni dai luci
comu natru Diu ‘n silenziu taci.

E penzu li raggi toi pinitranti,
la patrunanza nta sti cuntinenti
su’ testimoni di stori allarmanti,
comu chidda di Gesù e li so’ stenti,
carricatu cu la cruci pisanti
e sutta sforzu frustati e lamenti,
la registrasti ssa scena nfamanti
tutta trageria e china di turmenti?

Tiratu, umiliatu e ‘nsanguniatu,
vinni Gesù cca ‘n terra e fu trarutu,
stranu distinu chi ci fu assignatu,
un sacrificiu senza nuddu aiutu.
Fu un martiriu malu giudicatu,
di tutta la giudea ben vulutu.
Ma a lu carvariu lu sulì fu astutatu,
calau un sipariu e tuttu fù cumpiutu.

Misteru e putenza e ni lassau timuri,
tutti pintuti muti e a pinzari
‘ncurpati chi ammazzaru a lu Signuri,
è un piccatu chi ‘un si potti ammucciari.
Liggennu cu senza li sacri scritturi,
sintennu preti ‘n chiesa pridicari,
scutennu lu cori versu l’amuri
priamu Gesù, cusà nni pò turnari.



RESTANU CHIUSI
di Nino Pedone
Castellammare del Golfo (TP)

Si unu a la me porta tuppuliava
la porta, di 'na botta, si rapìa.
Lu pòviru cristianu mi cuntava
li tanti sacrifici chi facià.

Facennuci curaggiu l'attintava,
'na strata di spiranza ci dicìa,
cu li paroli mei lu sustintava,
la manu nni la spada ci battìa.

Pi dàrici 'n aiutu battagliaiava
e tuttu lu me 'mpegnu ci mittìa,
e di sicuru, nun mi cunurtava
si lu bisognu nun ci risulvìa.

Ora chi tanti porti tuppulùu,
restanu chiusi, zitti, allapazzati,
talìu li 'ncagghi e lustru nun nni viu
ma scuru chi si tagghia a cutiddati.




SICILIA 'N PRIMAVERA
di *Giuseppe Di Salvo*
Castellammare del Golfo (TP)

Primavera di suli sfulguranti,
luci chi duni la to calurìa,
coddì a punenti e affacci a livanti
e ni cunforti 'sta malincunìa.

Li raggi ch'affaccianu su' ardenti
e l'arvuliddu nuru si vistù,
puru l'aceddi ni sunnu cuntenti
di 'sta campagna tutta chi ciurù.

'Nta 'sti ciuri di loghi rampanti
l'apa chi cerca lu meli, firrìa,
sbatti l'aluzzi cu musica e canti,
pari chi dici la so püisìa.

Lu rusignolu canta primavera
'nta 'sti tappiti sbampati culura,
Sicilia bedda tu porti bannerra,
biddizzi, fantasia di la natura.



STIDDUZZA

di *Cristoforo Ancona*
Castellammare del Golfo (TP)

Vaiu, vegnu, mi fermu, votu e firrìu,
mi partu e ancora passiu.

Cunfusu sempri la stessa via fazzu,
peri 'ntra peri, li maruna allustru.

Li stiddi sunnu tutti 'n gran fermentu,
curiusu, portu l'occhi 'n celu e viu
brillari na stidda, chi pi lustruri trova paru
'nta lu pàrpitu di lu cori miu.

Vaiu, vegnu, mi fermu, votu e firrìu,
mi partu e ancora pensu,
na stidda nica nicaredda sta nascennu,
di nomu luntanu e anticu.

Cu la matri arristannu 'mpirugghiata,
l'avutri stiddi, li santi e li duttura curreu.
La matassa sfilaru, lu filu sciuggheru
e stidda lucenti, stidduzza sua strinciu.

Vaiu, vegnu, mi fermu, votu e firriù,
mi partu e ancora tampasù,
felici sugnu di lu letu avventu,
stidduzza nica adduma comu stidda lucenti.

Li donni pi la so criatura pàtinu turmenti,
arrisicanu, mittennu la vita puru 'n prigiudiziu.
L'omini chi pinsamu di capiri tuttu chistu,
lu rimediu chi trovamu? Chiddu di passiarì!